

四庫全書

集部

欽定四庫全書

集部

莊靖集

目錄
卷二

詳校官中書臣沈鵬

主事臣呂雲棟覆勘

覆校官中書臣汪師曾

校對官原任典簿臣郭祚熾

謄錄監生臣連彭年

欽定四庫全書

集部五

莊靖集目錄

別集類四

金

卷一

古賦

四言古詩

五言古詩

七言古詩

卷二

五言律詩

七言律詩

卷三

五言絕句

六言絕句

卷四

七言絕句

卷五

七言絕句

卷六

七言絕句

卷七

樂府

卷八

序

傳

譜

記

卷九

碑銘

贊

啟

榜

青詞

卷十

祭文

疏

表

上梁文

雜著

臣等謹按莊靖集十卷金李俊民撰俊民字
用章澤州人少通程氏之學承安五年以經

義舉進士第一應奉翰林文字未幾棄官教
授南遷後隱於嵩山自號鶴鳴道人元世祖
以安車召見仍乞還山卒賜諡莊靖先生集
凡詩七卷文三卷嘗為澤州守段正行所刊
行長平李仲紳等為之序明正德間郡人李
瀚重付諸梓今板已久佚所存祇抄本而已
俊民抗志遯荒不縻好爵出處之際能潔其
身集中於入元後祇書甲子隱然自比陶潛

故所作詩類多幽憂激烈之音繫念宗邦寄懷深遠不徒以清新奇傑為工文格沖澹和平具有高致亦復似其為人雖博大不及元好問而生平志節約畧相等實可謂無愧所學者矣詩末間有注語序不言何人所加殆即俊民所自注歟乾隆四十一年十月恭校上

總纂官臣紀昀臣陸錫熊臣孫士毅

總校官臣陸費墀

莊靖集原序

夫水之有源也始焉濫觴其流不已派而為川匯而為澤會而為江豬而為海波瀾吞吐乾溢如一乾坤涵浸古今不竭噫觀水者觀至于海觀止矣然後乃知其水之有源也若夫雨集而溝澮盈潦停而蹄涔漲朝滿夕除涸可立待是惡足以為水哉學之有本亦猶是也韻而為詩章聲而為樂府律而為詞賦廣而為騷雅其文愈弘其筆愈雄其篇愈鉅其詞益富蓋有本者之如

是其視落霞秋水畏日薰風一聯一詠雖膾炙人口然
器小易盈敵大則怯是惡足以為學哉吾鄉李用章先
生粵自弱冠以明經擢第為天下甲爾後仕官數奇積
年不調先生雅志亦厭於乾役恬於學問自初筮仕距
今四十餘年手不釋卷經傳子史百家之書無不研究
其學之有本可知矣故其作為文章句句有根源字字
有來歷格老而意新辭經而旨遠不涸不竭其汪洋之
學海歟郡牧段正卿公退之暇一日召諸士大夫謂之

曰澤雖巖邑俗尚儒風今桑田更變桂樹凋零幸有狀
元先生在是天之未喪斯文於吾地也使其平昔著述
秘而不揚我輩不厚顏乎遂裒集其文募工鋟木以壽
其傳可謂賢於用心矣豈特此耳又能重資大成之像
復新立道之堂給田以贍學校蠲役以優鄉秀此一舉
也衆美具焉自今以始吾道有所宗主可無慶乎故喜
而道其實歲次單閼三月哉生明長平李仲紳敬序
好古樂道之士作為文章豈偶然哉蓋感物即事傷時

懷舊陶寫蘊與之情涵泳無窮之意千態萬狀卒歸于
堯舜禹湯周孔授受服行之實學者仰之若泰山北斗
噫非極深造之妙者莫能至焉鶴鳴老人吾鄉之巨儒
國朝之名士也經學傳家尤長於禮未及壯歲擢進士
第一時方顯用勇退居閒朝經暮史冥搜隱索四十有餘
年其德行文學庶幾乎古雖片言隻字亦必有據如太
羹玄酒有典則而無浮華一時文士靡不推讓郡侯段
公銳意文事時與士大夫會于錦堂乃鳩集先生近年

著述得詩賦古文僅千餘篇合為十卷鏤板以傳僕忝
預席末雖不能增日月之光詎可無言故引之王特升
序

夫文之為文其來尚矣與造化一氣俱生者也日月照
臨星辰輝映天之文也山川流峙草木敷榮地之文也
人得天地之秀而為萬物之靈有仁義禮智以根於心
故觸物感情發而為言無非天下之至文也如風行水
上自然而然固非有力者之所強能亦豈徒吟詠風景

模寫物象而已哉將以經天緯地厚人倫美教化貫乎
道者也先生世家濩澤唐韓王元嘉之裔生而聰敏幼
而能文弱冠而魁天下蓋以學問精勤耽玩經史諸子
百家無不研究故其文章典贍華實相副字字有源流
句句有根柢格律清新似坡仙句法奇傑似山谷集句
圓熟脉絡貫穿半山老人之體也雄篇鉅章奔騰放逸
昌黎公之亞也小詩高古涵蓄尤有理致而極工巧非
得天地之秀其孰能與於此先生平昔著述多矣喪亂

以來蕩析殆盡此特晚年游戲之緒餘耳每一篇出土
大夫爭傳寫之第以不見全集為恨耳錦堂主人崇儒
重道待先生以忠厚迺與諸同道購求散落篇什募工
鋟木用廣其傳使國人有所矜式門下劉公濟之君祥
仲寬姚子昂左右其事未百日而工畢瀛久蒙先生教
載仍嘉錦堂之好事不揆荒蕪姑道其梗槩云爾余月
初吉劉瀛序

史稱唐文三變至韓昌黎而後稍稍可述誠確論也以

其當世文世類皆流於一偏如白樂天之平易李長吉之放逸孟東野之酸寒賈浪仙之窮苦是豈不欲去其偏而就其全乎蓋以平日所賦之性所養之氣所守之學迂踈局促執之而不能變之耳唯韓昌黎則不然中正之學發為文章粹然一出於正其於觴詠之間給談笑助諧謔叙人情狀物態鉤玄提要據古論今左右逢原意各有寓為時人之宗師豈一偏之所能囿哉我鶴鳴先生今之昌黎公也其出處事業自有年譜德行才

學自有公論雄文傑句板行于世名儒鉅公又從而備
序之尚何待僕之諛諛也然承先生之教游先生之門
誦其詩閱其文者三十餘年矣覩茲偉事安敢默然姑
道其萬一亦涓塵裨益之意也故喜而書之癸卯年四
月望日門人史秉直謹序

欽定四庫全書

莊靖集卷一

金 李俊民 撰

古賦

醉梨賦

花殘葉疎鳥勸提壺春回雨淚之容香滿白雪之膚得
之霜而顏始紅見其日而頭欲扶夫天之酒星不在於
天化為巢飲之徒煦甘嫗昔嚙膏臍張公之裔遊無
何之鄉哀家之胄入步兵之廚笑君子之交淡閔大夫

卷一
之色枯其未醉也磊磊落落高世之傑趨之者衆甚於
成蹊之李其既醉也昏昏漠漠保身之哲趨之者寡比
於不材之樗凌寒傲暑舞空蹈虛兀然將頽之叔夜塊
然獨留之淳于其醉於心者心朋心友也如郭奕之見
阮咸其醉於面者面朋面友也若程普之遇周瑜小二
豪之在側悼一夫之泣隅當是時也以日月為過客以
天地為遽廬猶笑夫獨醒之子不肯醺糟之餽舖乃有
心如渴烏勿燥未濡夢三江而吞五湖然後乃得蒙其

齒錄策一醉之勲也莫不愜魏梅之望快湯稼之蘇是
所謂以醉醒醉者邪梨之為物也秋而後成屬西方之
金其花皎而白金之色也其實甘而冽金之味也皆得
天地之義氣介然特立確乎不移此性之常也然今之
所謂醉者乃其性之變者歟故今日之放乃向日之拘
向日之潔乃今日之汙隨俗俛仰因時卷舒彼常而不
知變者未免乎憔悴而守其株者也嗚呼噫嘻以舉世
為桔槔邪則漢陰之甕不以用拙而不抱以舉世為鴟

夷邪則井眉之瓶不以迎危而不居盖可及者智不可及者愚然則是梨之醉也其中有趣雖父不能傳之子宜其楂之不如

馴鹿賦

有足而跂有角而枝處山而適食野而肥一旦為雉兔者所獲遂見繫於藩籬不纏而縛不械而羈覩常如崖異履平如險熾野哉之性何異夫由也之見仲尼鄭人之夢鄭人之疑秦人之指秦人之欺母而歸未能如西

巴之麋與犬而嬉慎勿效臨江之麋鹿兮鹿兮汝生我
依我恩汝知不見夫人之子食其肉而寢其皮

四言古詩

蕭權府三害圖

長橋之蛟南山之虎在彼州曲父老所苦豈獨苦此亦
有周處周乃慨然恥聞斯語薄險技深踊躍健武爾蛟
既除爾虎既去周乃自勵履規蹈矩卒以將種效忠典
午按劍平西貞節克舉瑕以瑜掩過以功補身雖云亡

名播千古

止姚亞之刳羊

養生之鞭隴種之苗欲魯去朔在齊聞韶咄嗟老饕腹
如瓠枵踏破菜園合喫藤條

焦天祿野叟聽音圖

梨園弟子天寶之後誰其知音百歲遺叟曲終悵然淚
迸林藪時清眼明萬事緘口

唐叔王韋生卧虎圖

梁鴛之養或失其時曹公之肉不救其饑羊質而皮狐
假而威誰能於此辯是與非

學中史正之會客

有懷伊人在泮飲酒我客戾止其嘗旨否未見君子我
心孔疚惓然肯來小大稽首

烟江絕島圖

江風不波峭壁森立冥冥飛鴻翔而後集

雙松古渡圖

傾蓋相逢堂堂兩公寂寥渡口以濟不通

古栢寒泉圖

冬夏長青晝夜不捨拔本塞源豈知量者

紙扇

竹疏而骨楮剥而膚權以行異風乎坐隅

梭扇

直節貫中怒髮衝上朝蠅暮蚊畏風長往

五言古詩

成之夜談省庭新事

偉哉青雲器底蘊莫能見開口論利害坐客服雄辯汪
汪江海量氣不許黃憲從來布衣願一擲輕百萬投爪
必報瓊豈望在焚券雖承雨露恩慷慨輒自獻與其便
於已孰若於國便蓋嘗推此心天下欲兼善儒家惟有
孟日夜講不倦儻以利為利請看貨殖傳

復和

驅馳戎馬間太平不復見往往談雋永寧許齊士辯有

田宜早歸奪恐遭實憲再三欲買鄰愧我無千萬難倩
沽酒奴待立便了券籌堂天下士風度邁羲獻別後曳
裾人造門恨無便握手再相逢虛左待益善平生身口
累老大折腰倦莫訝陶先生自作五柳傳

鎮山堂

崢嶸屋下城突兀城上屋初看頗驚眼再見堪捧腹能
無鬼神笑可奈瘡痍俗不哀梁間叟欲竭南山木

嵇康淬劍石

尋常論養生未得養生說擬從林下遊一書交盡絕既
無當世志安用三尺鐵頻頻石上磨神光浸秋月可憐
粗疎甚自謀何太拙危絃發哀彈幽憤終莫洩死留身
後名有愧侍中血

樊噲戲石

丈夫氣慷慨隱迹在東市或逢逐鹿人乃棄屠狗事壯
哉鼓刀勇旁若舞劍地遂摧拔山力自嘆時不利至今
空山石傳是將軍戲能興勿金運頗與黃石類不期兩

都後復有三國志過客對春風徒灑山陽淚

寄籌堂

老為人所憐貧恨友獨寡等閒門外車盡入宰肉社欲
隨射虎將爭奈無足馬安得化為雲四方逐東野大庇
天下士擬作萬間厦顧我蓋頭茅寧肯助一把非無問
舍心或恐卧牀下縱有願留人有館不能假還因索居
久往往罪商也須待舍館定然後見長者

毛晉卿肖山堂

悠然林下客，世事頗能料。閒中意自適，身外名肯釣。
居山之陽，初為識者笑。勢將凌岱華，氣欲吞嵩少。方尋
愿谷隱，稍近孫臺嘯。微茫數烟岫，巉絕對雲嶠。為我增
雙明，未必在遠眺。始雖如面友，久乃得心照。恐隨有力
去，或被移文誚。已見成膏肓，百計莫可療。一時烟霞語，
慎勿駭廊廟。咄哉肖山堂，所以警不肖。

廟學落成

斯文天未喪，吾道有時厄。方嗟鳳兮衰，遽嘆麟也獲。繼

遭秦焚書又被魯壞宅邇來天下事多自馬上得不修
下車禮不獻在泮馘不授羽林經不講博士席旁若沒
字碑肯見一達掖偶因長樂老盡挾兔園冊及見中選
人始知為學益學者如牛毛自古數獲澤連年取青紫
易於地芥拾爭將逸駕攀遂向塞路闢揮之無倚門從
者皆入室肅肅俎豆風洋洋絃歌邑幾時復論秀四海
望偃伯術能嚮者誰世無秋風客

德老栽花成竹

為藥花

物性隨所移歲晚氣自變失却本來身還於身外見得
叅玉版禪如對菩薩面叢林一花祖派入香嚴傳

劉漢臣堂甫北歸

哀哉同隊魚盡在枯池裏縱免鼎中烹將見渴欲死造
物何不仁豈獨困二子我雖江湖心恨無斗升水

母應之餉黍

憶昔周室衰周人詠黍離君今餉我黍為賦黍離詩厥
初藝黍時飯牛使牛肥八月黍未穫番兒驅牛歸番兒

不滿欲我民還買犢今秋犢未大又被番兒逐番兒皆飽肉我民食不足食不足尚可鬻子輸官粟

遊碧落

壬寅重午日陪郡侯段正卿暨王用亨劉漢臣濟之君祥仲寬姚子昂張唐臣祿卿平陽趙君王王潤之同行

浮雲翳炎景長夏愜幽事相陪林下友共造金碧地清流漱寒玉老樹聳蒼翠何人開山祖妙處發天秘悠悠

歲月深剝落磨崖字
遨頭興不淺有酒留客醉
幽鳥背人飛不慣
聞鼓吹抵暮出山門
溪風送歸騎

史遂良索詩

立身有道邦誰似
直哉史流傳百世後
各各異行止
許史有何厚在漢勢如彼
安史有何薄在唐亂如此
人之賢與愚皆為類
所使近從儕輩中
偶得一狂士
未能通一經
謂可拾青紫
時時出俚句
枝癢不自己
只恐落調歌
難入知音耳
縱橫言世事
不顧刺舌恥
焉知阮嗣宗

口不挂臧否年高鬢如雪鄉曲所不齒試與阿戎談吐

哉犁之子

男牛兒

留別李巽之

癸卯三月十七日癸巳

嗟嗟平生交所恨不耐久幾年戎馬間大半正丘首憶
初識君面同門皆小友倏忽五十春相見成老叟淹淹
泉下人樹拱骨已朽崎嶇見在身何幸得此壽感慨歲
云晚哀淚迸林藪古今均一夢萬事付杯酒

七言古詩

司諫許道真徵復圖

君不見退休綠野平淮相靈臺不許丹青狀又不見五
湖歸去鷗夷槩越人爭鑄黃金像功成身退天之道道
直天憐去官早鹽梅須借築巖人羽翼重來採芝老袖
中諫草力回天害除利興車載懸何憂不識荊州面圖
畫如今處處傳

郭顯道美人圖

君不見昭陽殿裏蓬萊人終惹漁陽胡馬塵又不見吳

宮夜夜烏棲曲竟使姑蘇走麋鹿移人大抵物之尤喪
亂未免天公愁雖然丹青不解語冷眼指作鄉溫柔試
問人間何處有畫師恐是傾國手却憐當日毛延壽故
寫巫山女麋醜

杜詩誰道巫山女麋醜何得此有昭君村

宣差射虎

十二月初九日

北原風勁霜草枯草間出沒藏於菟
晚來此被誰驅不防邂逅馮婦車
將軍膽氣勇有餘手中笑撚金僕姑

等閒如射兔與狐兩眼錯莫精光無深山大澤失所居
或撩汝頭編汝鬚可憐肉食無遠圖伎倆不及黔之驢
羣鼠為耗而猫不捕

欺人鼠輩爭出頭夜行如市晝不休渴時欲竭滿河飲
饑後共覓太倉偷有時憑社竊所貴亦為忌器不忍投
某氏終貽子神禍祐甫恨不猫職修受畜於人惡除害
祭有八蜡禮頗優近憐銜蟬在我側何故肉食無遠謀
耿耿雄相猛於虎不肯捕捉分人憂縱令同乳不同氣

金史卷一百一十五
卷一
一旦反目恩為讎君不見唐家拔宅雞犬上昇去彼鼠
獨墮天不收

仙傳唐公昉師李八百得其神母遂舉家昇天雞
犬皆去唯鼠空中自墮腸出一月三易其腸今山
下有拖腸鼠東廣微所謂唐鼠

掃晴婦

世俗為掃晴婦者蓋假變理之手導陰陽之
和使民間免乾溢之患也感其事而賦之

卷袖褰裳手持帚挂向陰空便搖手前推後却不辭勞
欲動不動誰掣肘偶人相對木與土神女但誇朝復暮
龍公不作本分事中間多少閒雲雨見說周人憂旱母
寧知東海無冤婦慙慙更倩封家姨一時斷送龍回首

雨電

庚子年四月二十八日壬戌大雨電五月七
日八日又電按左傳昭公四年魯大夫申豐
曰聖人在上無電雖有不為災以古者藏冰

為禦電之道祭寒而藏之獻羔而啓之今棄而不用電之為災誰能禦之由是言之禦火其在人乎感而賦詩傷今之不如古也

按月令仲夏行冬令則電凍傷穀注子之氣乘之也陽為雨陰起脅之凝為電

雲龍失守元氣乖隱隱愁聽狂車雷須臾飄驟不成雨一天風電從何來交橫散落星石隕紛霍迸擊冰山摧坳平忽訝坑谷滿埳起俄作丘陵堆驚忙飛走殘殄天

斷喪枝葉枯根荄穿窻入戶彈相射填街溢巷把莫推
恢恢難補天網漏凜凜欲壓坤軸頽一方生理遭殄瘁
造物不恤空自哀是時仲夏行冬令誰把四序顛倒催
雖有舜絃愠不解孰謂鄒律春能回陽雖位降乾道在
一陰纔進力可排履霜之漸此其始司寒挾黨結禍胎
春秋大小百餘國獨向魯地三為灾

左傳僖公二十九年昭三年昭四年

大雨電

世間萬事豈不見那用區區書觀臺我思天變豈

徒爾以象告人當自裁

五行志占電有眼天罰戒民過也

鼎齋

司馬景仁因病瘡而得腹疾鼎齋療之而愈

因索詩為賦

茂陵千載文園客流傳耳孫猶病渴引飲自嫌江海窄
家無麴蘖奈腹疾水帝之魂成水厄女丁婦壬不相得
始圖一溉滋湯旱卒見九河歸禹畫嘗聞秋夫曾療鬼
大勝扁鵲能起號君不見上醫可醫國異哉鼎齋堪鼎

食

姚子昂畫馬

雄姿卓立開天骨騰踏萬里如神速可憐不遇九方臯
空使時人指為鹿自從大奴守天育無由更騁追風足
中原一戰收乾坤白髮將軍髀生肉

苴履

待詔門前東郭趾藍關路上仙人迹雪花紛披蓋地白
東家不借借不得雖然近市屨亦無以故為新即有餘

同行留我木上座補過仰渠金十奴一生能著屐幾兩
用心猶在阮孚上不須更覓下邳侯山林此計成長往
時守下邳

兒輩刻木作匙

一震之威乃如此坐間或失將軍七不能便染公子指
有意欲割崑奴耳小兒造物窮物理斗柄之揭如其尾
雖然劍頭有炊米又愁遇著挨手鬼

聞蔡州破

甲午年正月十日己酉

不周力摧天柱折陰山怨徹青冢骨方將一擲賭乾坤
誰謂四面無日月石馬汗滴昭陵血銅人淚泣秋風客
君不見周家美化八百年遺恨黍離詩一篇

籌堂尋梅

蕭疎籬落誰家圃尋芳信逐游蜂去眼前荊棘少人行
馬蹄直到香來處怕愁貪睡獨開遲瘦損春寒鶴膝枝
可是東君苦留客斜風細雨不堪詩

和秦彥容韻

五首

彦容寄詩有先生高見真吾師速營菟裘猶
恨遲牕明炕暖十笏地松風蕭蕭和陶詩
山野已尋雲外路直入天壇最深處踏開
李愿舊游蹤請君自草盤谷序之句故依
韻和之

養賢列鼎手自烹燮調元化和如羹馬蹄一蹙燕地裂
氊裘尚拂陰山雪將軍表請願出師壯士戈揮惟恐遲
武成纔試二三策黍離已見閔周詩縱橫門外豺狼路

我老此身無著處君不見平淮十萬兵猶向襄陽守朱

序

見征淮漢

君不見子幼自勞羔日烹何如命駕季鷹吳中煮蓴羹
又不見姜侯設鱠鑿冰裂何如徒步拾遺長饒黃獨雪
幸遇南來董鍊師說似壺天日月遲謫仙之游乃非謫
長安市上斗酒百篇詩蒲輪休指商山路得到白雲採
芝處諸生待揖隆準翁馬上未遑事庠序

獵犬已為兔死烹猶向漢俎分杯羹脚靴手板凍欲裂

尚立唐堦沒膝雪三寸古為帝者師終比赤松見事遲
相看一笑在目擊何用左思招隱詩出門便是天壇路
雲間指點巢仙處不辭杖屨從子遊王者之後養老在

西序

時寄王子榮西齋

穀因辟後厭鼎烹那在丘嫂轅釜羹冠未挂前已先裂
一簪却上山頭雪我雖無師心我師速修何恨下手遲
論中自得養生理筆底盡是游仙詩休向回車問前路
終須有箇安排處晴窓點檢白雲篇不知誰為作者序

不嫌瓠葉日猶烹不羨公子染指爭龜羹不把荷衣等
閒裂不羨曹人共服麻如雪愛身骨似賤場師凡骨只
愁輕舉遲北山未出移休勒東老雖貧樂有詩望中雲
海蓬萊路誰道樂天無歸處一千年鶴再來時行鴈難
將弟兄序

暴雨

秋夜暴雨上漏下濕終夕不寐因得鄙句奉
呈

疾雷破山雲暗天雨脚不斷如麻懸淋浪一室無乾處
何異露坐乘漏船鼠牙便是潰隄蟻牆有百道飛來泉
狂客豈因狂藥使眼花如落井底眠採石江頭弄明月
一夕去作騎鯨仙我雖忘我亦可憐但恐不免蛟龍涎
苦無根源笑潢潦可能朝宗東注覓海道君不見來陽
禹力所不到至今難尋杜陵老

綵樓

高平縣綵樓聞之舊矣今始親見議者猶謂

高下侈麗不及向者三分之一因感而賦之
層層華構高且崇萬綵糾結填青紅何人下手奪天巧
都入意匠經營中書契以來未省見異事驚倒百歲翁
郢斤般斧莫敢近却立屏息慙無功寒窓戛戛鳴機婦
積年杼柚一日空山川謂可錦繡裹塵土盡皆羅綺封
前者攀轅後者挽奔車徑欲趨靈宮三年送迎禮雖舊
人事不與天時同方當炎厲行夏令權勢大抵歸祝融
神之於人無厚薄蓋以至誠能感通豚蹄豆酒道旁祝

所獲神賜亦已豐問閭疾苦還知否我為大夫歌大東
享炎帝閏年

上九里谷與濟之君祥仲寬李德方朱壽之姚
子昂

太行巍巍形勢尊造物設險雄中原巨靈一朝擘石裂
連峯忽斷開山門侵雲直上幾千尺挂壁一徑愁攀援
十步回頭五步坐慄慄汗出如漿飈清風掖至最高頂
下視寰海塵埃昏天壇咫尺若有待顧我不往慙食言

世間好處豈不愛脚力雖盡心長存為君試寫遠遊興

夜半月出清吟魂

與祁定之約
遊天壇不果

剝蓮蓬

相將去採秋江蓮青房戢戢飽且圓倒數收蒔亦可喜
春筍未剥空流涎玉井有花開十丈至今依舊藕如船
試索綵莖不尋藕與誰共此從巢仙

遼漆水郡王降虎

陳仲和之遠祖

秋風漸高秋草衰空山校獵千騎圍突然有物勢闕猛

萬里侯相食肉肥橫行妥尾不畏逐挾闕似有百步威

當時虜從懦於鼠雖欲下車人其非將軍一奮躍身出

氣雄志勇捷若飛攘臂搏虎虎負去須臾闕皮擒虎歸

北方銳兒皆好武無愧疋馬及短衣聲名赫赫耀前古

却笑馮婦膽力微昨田命氏報恩異至今漆水生光輝

君不見射石李廣一箭亦可喜死不封侯知者希

遺善堂

雪巖老人欲其子孫之善何如是諄諄也哉

有子仲賢以其遺命書之於堂訂曰遺善遵
而行之朝夕於是其命之使行者不敢不行
其所行者皆善事也命之使不行者不敢行
其所不行者皆不善事也非惟不失士君子
之行其孝子之心何時而已耶噫處世兵革
之間不忘於善亦所未聞故喜而為之詩

君不見遺子韋侯只一經相門出相那在金滿籬又不
見燕山教子以義方靈椿老去五枝丹桂芳破散錢堆

一百屋紫微不願有子如窟郎陷為天下輕薄子伏波
不願有子學季良身前身後事茫茫我恤我躬猶未遑
長把賢愚挂懷抱請看積善之家遺善堂

贈出家張翔卿

翔卿河內人也籌堂毀其簪冠使復儒業昔
唐李素拜河南少尹呂氏子吳棄其妻著道
士衣冠謝母曰當學仙王屋山去數月復出
間詣公公立之府門外使吏卒脫道士冠給

冠帶送付其母事類翔卿故書

大袖斜襟麤布袍髻了撐似彌明高滑稽自謂世可玩
清淨不守形徒勞百年光景已強半容易便把青春拋
欲向蓬壺尋福地奈何龍伯釣後負山無海鰲欲駕天
風朝帝闕奈何巫陽去後九虎守關牢養生未獲一溉
力那忍遽絕平生交但今造物哀正直豈肯屈曲從仙
巢留侯學道欲輕舉尚且強食扶金刀安期當年本策
士意氣直謁扛鼎豪平地作仙亦不惡或恐上界官府

名難逃

後山詩話昔之黠者滑稽以玩世蒯通初善齊人
安期生安期生嘗干項羽羽不能用其策而項羽
欲封此兩人兩人卒不肯受

君不見醉吟居士不歸海上山又不見昌黎先生屈曲
自世間况非出塵風骨羽化難夜叉白日守天關黃庭
正恐坐誤讀鉄鎖縱垂那可攀我笑學仙王屋著道冠
只待河南李侯脫去然後還

籌堂燕

籌堂梁上巢燕將雛幾墮鼠計飛鳴哀訴者
久之主人得其情而護焉卒無所害夫舐犢
之愛物物皆爾感而為之賦且以戲克紹

陰陰池館落花泥出入通家獨見知曾遭江上淘河嚇
又被巢邊野雀欺且欺且嚇亦不惡奈有鼠輩窺其兒
兒方在卵卵何危哀鳴若訴奚勝悲主人能得腹中事
百計護持彼毒無所施羽毛養就刀剪齊雄雌相隨引

雛飛尋常百姓家
汝巢非汝宜春兮
來秋兮歸莫忘爲
衣巷裏時

趙倅司馬山謝雨

乙未歲旱自春徂夏五月丙申澤倅趙公唐
齋沐潔誠就司馬山祈禱八日庚子大雨年
穀遂登民物安逸累獲嘉應次年丁酉孟夏
己丑公與本郡僚屬父老人等具牲幣酒醪
簫鼓之禮仰答神休仍求嗣歲祭畢聊識歲

月云爾

去歲不雨民憂深愆陽亢甚多伏陰冥冥造物豈難料
感以至誠神所歆我公默禱若響應出岫誰謂雲無心
天瓢疑是池中水三日以往皆為霖淋漓元氣滿人望
解慍何止薰風琴家家豚酒樂豐歲空山鼎沸簫鼓音
春祈秋報有常典仰荷靈貺如桑林

四舍人生日

驥之子鳳之雛精彩丰容美且都年至十二三頭角已

異同隊魚積善之家慶有餘掌中幸得雙明珠定知他
日必充閭不妨更讀古人書絳帳先生當合之範模步
亦步趨亦趨執經北面預先講唐虞明主何嘗不用儒
相門出相文可無豈獨手撚金僕姑能騎生馬駒然後
稱為大丈夫

贈儒醫卜養正

孰親如身在所慎一病能惱安樂性囊中探丸起九死
以其病病人不病豈獨和扁號神聖能於鬼手奪人命

嘗聞上醫可醫國何不使權造物柄

游濟源

庚子春季與劉濟之君祥仲寬仲美姚子昂
秦懿夫馬子溫李德方深之伯英朱壽之下
太行抵覃懷望方口臨沅水二十三日丁亥
郡侯段正卿因西山鎮遏回自析城來赴期
值雨留宿奉仙觀翌日巳丑天霽具牲酒幣
帛謁清源王廟禮畢會友人郭伯王李慶之

王天益史德秀王輔卿紇石烈仲傑完顏壽
之方外士祁定之郭道正元明道部將段王
等大飲於裴公亭用麾下鼓吹以樂賓薄暮
極歡而罷故賦之紀一時之勝游也

元戎小隊間登臨悠悠旌旆穿山林太行南路險澁
不憚著脚窮幽尋清源祭秩世所重喬木掩映靈宮深
是時方口雨初過天風破曉開微陰入門為問廟見禮
白髮黃冠通古今且言享誠非享物郡在與俗占浮沈

鞠躬執簡默有禱脯酒縱薄神所歆幾年願違莫能遂
至此始得償初心點檢圖經歎禹迹山青水綠無知音
竹根醉倒客星散夜聽波底蛟龍吟

樊氏昆仲懶窠

君不見讀書邊孝先謂師可嘲何典記又不見梁州陰
子春足不肯洗恐敗事何須向人說道理養得疎慵性
如此擺手便行誰家子嵩洛之間兩居士未嘗點檢形
骸外挂角矜羊心已死問之非漁亦非樵人言似癡還

似高叔夜自知不堪七以書遂絕平生交一官從此束
高閣賴是天教閒處著時人爭賦懶窠詩我羨懶窠詩
不作

壬申歲旱官為設食以濟饑民

千里地赤澤未霑驕陽為沴烈火炎就中秦頭晉尾旱
魃所棲托十室九室突不黔撐腸一飽豈易得咀嚼草
木如薺甜山川課雲職不舉無乃風伯號令嚴民是天
民天自恤何時霹靂起龍潛

男楊洗兒 十九歲

自慚無德為兒父今朝把酒為兒壽為兒令賦洗兒詩
願兒他日於兒厚我猶不恤況我後委蛻自天汝非有
速宜修德大吾門無復童心年十九

兒歸來 禽名

兒歸來兒歸來百年郎罷恨何日寧馨回東去但除嚴
母墓望思空築茂陵臺兒歸來兒歸來一聲未盡一聲
哀

金匱要略卷一
贈郭顯道醫

惡石聚散元氣撲本草搜剔造化窟俱收並蓄籠中物
山精水怪藏不得休言魄為天所奪入其手者命可活
須防姮娥去奔月大勝扁鵲能起號君不見錢子飛藥
不敢施為鬼脅

和答董用之

將軍死戰血染衣空山白骨鬼夜啼洗兵政要及時雨
天禍未悔無雲霓卧龍不起主張漢獵犬待烹僥倖齊

就中儒冠身多誤如坐矮屋頭常低敢將龍鍾哀造物
但幸老大能扶犁咄哉董生三寸舌善謔不思為虐兮
人間回首憂患始去之不速將噬臍

再和秦彥容韻

虞庠歌後伏雌烹箸猶未下愁覆羹布衾多年踏裏裂
夜半寒窓灑風雪待與重尋痛飲師東山杲杲日出遲
撐腸拄腹文字五千卷一字不入高人詩幾年不踏紅
塵路直入白雲最深處君不見洛陽城下未歸魂一夢

思鄉歎溫序

後漢溫序次房行部至襄武為隗囂將荀宇所執
欲降之序不聽伏劍而死光武命送喪到洛陽為塚
地長子壽為鄒平侯相夢序告之曰久客思鄉里
壽即棄官上書乞骸骨歸葬帝許之乃反舊塋焉

莊靖集卷一

欽定四庫全書

莊靖集卷二

金 李俊民 撰

五言律詩

答祁定之韻

黃菊催秋暮青山勸客歸
事隨時漸改人與物皆非
爽氣收殘暑閒雲送落暉
平生會心侶別後往來稀

游太平泉

稍有林泉興相陪杖屨游
百年人易老千種事堪愁
是

處花無主誰家酒可窮
芳時好行樂春去不能留

宿夾谷彥實菴

挂名仙籍上晦跡茂林間
門外丹河永牆頭明月山
境隨心自遠人與話俱閒
應笑紅塵客區區謾往還

河橋成

橋成有日必有佳句寫河上
逍遙之興贈子榮及督後楊成之

預積他山木重新兩岸隄
龍依天上卧虹傍水心低不

假鞭秦石何勞立蜀犀落成應有日誰向柱先題

又

河廣思同濟天寒怕涉冬冰雖將自合船尚不宜從柱
引來歸鶴淵歲未躍龍一編圯上叟千載願相逢

又

勢截長河浪橫陳百步梁經營方斷手過涉不褰裳漫
惜千金瓠休誇一葦航西風簫鼓咽奠酒水仙堂

癸巳冬至

共愁天紀亂依舊日南時氣本自然應策令誰可推每
懷添線女還意覆杯兒偃蹇無歸計天涯兩鬢絲

又

歲以四時成氣自一陽始雖然廢義職那可亂軒紀人
生幾寒暑天道頻甲子徒嗟潦倒身汲汲百年裏

乙未冬至

已應黃宮律初生復卦陽道隨天在北愁與日俱長節
物驚時換年光有底忙浮雲多變態試與問何祥

任仲山弄璋

奕世多陰德傳家得寧馨
人間熊有夢天上昴無星
喜洽犀錢座光生玉樹庭
鍾情笑盧老白髮望添丁

五哥生日

落落青雲器天然骨骼奇
自從懷橘後每恨學書遲
同樂憐荆樹相煎笑豆其
氣豪常自許躍馬自男兒

代四哥贈

相戒南陔養長看花萼輝
義深姜季被恩重老萊衣
隊

似魚同戲行如鴈共飛讀書當自勉繼取錦堂歸

元夜有感

春城行欲遍百感到愁邊市冷猶燈火人稀尚管絃梅
從今夜落柑憶舊時傳歸去西窓月無情照不眠

四哥生日

秀出三株樹芳聯五桂枝杜家憐驥子徐氏重麟兒已
有高門望方當志學時一杯添壽酒滿酌不須辭

寒食

為戀風光好那堪節物催事隨浮世往花侶去年開莫
洒無家淚須傾有限杯詩人多少興都向醉中來

九日下山

宰肉陳平社折腰元亮鄉車無門外轍菊與徑皆荒所
恨國難守若為家不亡天威寒氣逼急急下山陽

王生壽日

幾度縣弧節當年琢玉郎徐行知禮讓幼學愛文章莫
厭魚同隊休隨燕入堂眉間色多喜禁鬱近東牀

游青蓮

閒攜方外友同謁梵王宮
山吐三更月松搖萬壑風
流年飛鳥過浮世落花空
不有歸來興何能見遠公

又

行處春風惡山中勝槩藏
漸佳如蔗尾薄險似羊腸
翠揖雙峰角清臨一水堂
夜長僧睡少為我話興亡

過雲中

把酒不成醉出門行路難
客愁千里破歸夢五更殘
三

仕有何喜一生常鮮歡恨無南去鴈為我報平安

宿海會寺

同孫講師明上人趙叔寶劉巨濟夜酌

佛堂光未放桑下喚難回是處皆堪歇何山不可開
泉因龍吐出經自兔銜來徑向黃沙過尋僧問劫灰

又

青山雲水窟杖錫幾時來竹待香嚴擊松經道者栽
西江無水吸震旦忽花開三笑圖中友同傾破戒杯

遊碧落

乙亥仲夏十有九日平水曹漢卿楊子方本
郡李鑑臣劉濟之君祥姚子昂史遂良同謁
治平院與上人和霽月煮茗道話抵暮而歸
寂歷松間寺臨流勝槩藏斷雲開石壁橫吹爽溪堂謾
與詩情在留連道話長行人貪弔古歸路半斜陽

九里谷

九曲羊腸路千層劒戟山行鉤藤蔓刺坐印石花斑樹

發三春暮雲歸萬壑閒相陪林下屐雖倦不知還

食芡

池底休鋪錦雞頭自有裁柔中皆水性剛外乃天才精
彩惟魚目珠圓出蚌胎坐間咄嗟致不似荔枝來

潁陽元道人虛白菴

有山心可算有水耳堪洗飄飄元逸人寓意在山水勘
破人間世不聽心與耳一室虛生白自得吉祥止

八日登山同謁吳王祠

四月

老樹凋殘盡靈祠寂歷中古今時易改幽顯意能通歲
享屢登樂俗追三讓風送迎人散後日落亂山空

陽城懷舊

呈陽敬之燕子和李文卿

路梗傷時事春歸感物華風波千萬丈烟火兩三家樹
杪失巢燕牆根無主花當年人不見何處是生涯

又

道途行處惡故舊別來稀澗口分流水林梢挂落暉好
山留客住幽鳥背人飛門外秋光老征鞍尚不歸

上長平寄楊成之

衰遲長在外，雙鑠愧征鞍。
世路驚心惡，天風刮面寒。
迢迢人漸遠，冉冉歲將殘。
今夜梅梢月，同誰共倚欄。

獨坐

地偏無俗客，日在掩柴扉。
暑退閒蒲扇，涼生換葛衣。
風高雲散影，露下月揚輝。
獨據胡牀坐，心清即道機。

乙亥過河

一身長道路，四海尚風塵。
昔作依劉客，今為去魯人。
渡

河年在亥乞酒歲非申別後山中友相逢話又新

河陽呈苗簡叔

妖氣長斗北殺氣尚河東人物不如古地圖祇自雄三
城環野水二麥卧天風多少逃亡屋荒涼晚照中

即事

炎涼愁裏過陵谷暗中遷素拙生生計尋耕下下田為
嫌頻告糴却恨不逢年門外催租吏長妨對聖賢

中秋對月

雲山懷素隱秋興暫來歸月與人同醉星隨客漸稀入
河蟾不沒遶樹鵲何依浩氣凝光界瑤臺夢欲飛

山中寄張漢臣李廣之

枳棘非所棲繫匏焉不食未黔墨子突又奪伯氏邑一
年三褫服半歲兩塗敕歸去來山中無喪亦無得

經童

盈門修鄭校同隊執韋經蘇子應千里徐兒向九齡鴈
行成次序鶯語太丁寧堪笑西城老朝朝酷教刑

自遣

居閒聊自適造物果何如
生理年年拙交情日日疎
吠猶聞跼犬枝可笑黔驢誰識徘徊意西山有舊廬

過星軹

古道開天險危峯拔地形
連營南北戍過客短長亭
野燒驚山鬼胡雲掩將星
何人弄羌管哀怨不堪聽

七言律詩

小旱雲而不雨

阿香誰使送雷聲敢望天瓢一滴分恨魃長為周地虐
閔邲幾被魯人焚風吹海立垂垂雨澤與山通處處雲
何事卧龍猶不起得微往見葛陂君

注山谷得微往從董父餐寧當罪繫葛陂淵

復用韻

區區布穀不停聲安得銀河水半分湯稼未應枯後溉
周川豈獨旱如焚是誰主當知時雨有底商量出岫雲
造物不為天下計只將花事了東君

十六日雨

平地俄驚霹靂聲老龍功過此應分不知東海因誰祭
却笑西華欲自焚四面蔽虧無日月百神奔走會風雲
時人那識天公事一溉惟知有巨君

注鄭弘字巨君行春天旱隨車致雨

注後戴卦為四華令縣旱積薪以自焚火起而大雨

王子榮過家上冢

暫領元戎小隊行盡驅春色入山城葱葱佳氣隨軒蓋

嫋嫋高風卷旆旌題柱橋邊男子志散金閨里故人情
貴游前後知多少不使堂虛畫錦名

州有畫
錦堂

用趙之美留別韻

五首

把酒離筵且莫辭坐中瓜葛暫相依花從識後常含笑
鳥自還時想倦飛往事微茫春夢斷故人牢落曉星稀
天涯白髮禁愁得好在西山不早歸

長短亭中送別時問君東去復何依今宵明月三人共
來日紅塵一騎飛傾蓋莫嫌相見晚斷絃惟恨賞音稀

天涯盡道還家好笑我雖歸似不歸

為君不惜送行詩但恨蒹葭失所依
流水盡朝東海去孤雲只向太行飛
仕途冰炭收心早客路參商見面稀
一曲陽關歌未徹聲聲頭上聽催歸

遙指東山去恨遲爭如蓮幕早來依
須知宋鷁猶能退有底齊禽尚不飛
洛下書生憐我少燕南壯士似君稀
主人好客慊慊醉正要髭留肯放歸

平生藏器待何時除卻荊州不可依
預報行人應鵲噪

相將送客有花飛鴈從去後弟兄少
鴛未來時朋友稀
不盡赤心今日話東山無以我公歸

赴山陽

寄君祥濟之仲寬子昂

立馬西風不忍行
往回只是片時程
一年又作半年客
百里有如千里情
落日寒林山下路
淡烟疎竹水邊城
願君把酒休惆悵
四海由來皆弟兄

白文舉王百一索句送行

世事紛紛亂似麻
不堪愁裏度年華
傷心城郭來家鶴

過眼光陰赴壑蛇彈缺歌中成老境班荆話後各天涯
何時造物歸真宰卻覩人間第一花

承二公寵和復用元韻

二首

脫却朝衫著紵麻殘年猶復夢京華世情共指鹿為馬
天意反教龍作蛇白髮不公人易老青山有素恨無涯
那禁送別東郊外滿目離離濺淚花

有客衡從說藝麻要教身後見西華若為養得能言鴨
未解除他引睡蛇歸去稍知閒氣味荒唐猶種老生涯

眼前浮世憑誰問，獨倚東風看落花。

重午偶題

龍鍾歎我百年身，幾見山城節物新。
水荇長如牽翠帶，石榴半似蹙紅巾。
可憐今日依劉客，便是當時弔屈人。
誰道南來風解愠，試從北屋問吾民。

春日

白頭不奈隙駒催，慣飲屠酥最後杯。
百歲無多偏晝短，一年將盡又春來。
東君得地權終在，北斗隨天柄已回。

造物却還真宰手衆人今後試登臺

和叅謀李舜舉二

平步青雲感遇初試看傾蓋氣何如橘皮應笑陳人勝
雋永爭談辯士書夢鹿果能誰得鹿知魚未必子非魚
青山馬上多詩句北斗以南名不虛

一怒王師弔伐初堂堂人物古誰如劒頭何患無炊米
楯鼻多應有檄書盡道公孫能躍馬應憐學士獨焚魚
旌旗未度長河水千騎元戎已擣虛

和東菴孔安道韻二

擬結間中一草堂此心安處即吾鄉須知見在身為患
見說長生藥有方老去看書徒引睡愁來得句不成章
從前習氣都除盡待與高人論坐忘

淡泊生涯共一堂杖藜踏遍水雲鄉不妨廬結在人境
應念客來從遠方三笑可無陶靖節八仙宜得賀知章
袖中時出烟霞語習氣師兄亦未忘

和子榮

暫使彭宣到後堂安昌只以醉為鄉浮雲世事日千變
流水生涯天一方老子興雖如庾亮故人恩不減蘇章
能消幾兩尋山屐回首孤邱本未忘

五舍人生朝

積德高門慶有餘隔年記得掌中珠清新月窟兩枝桂
後逸渥洼千里駒戲自老成看蠟鳳志從小異見樗蒲
一朝騰踏青雲上快覩徐卿第二雛

籌堂壽日

此生但覺醉鄉寬

王績

誰謂螭猶北海蟠

王猛

處處相

迎皆倒屣

王粲

人人共喜欲彈冠

王陽

州應向日懸刀

夢

王濬

山試今朝挂笏看

王子猷

仙馭未來緱氏鶴月

明吹徹玉笙寒

王喬

烏衣歷歷是名家人物于今比晉多俗論不侵揮麈話

王衍

壯懷都付缺壺歌

王大將軍

雖無金埒堪調馬

王

濟賴有黃庭可換鵞

王羲之

見說長江欲飛渡

王濬

那

須冰合望潯沱

王霸

和子搢中秋

最後賓來舉白浮要須同賞桂花秋蛾郎應恨燈無焰
嬖女能教月再修分外高寒天上闕就中明徹水邊樓
姮娥不我為生客休把光芒取次收

和子搢九日謾興

此身到處賈胡留細雨斜風冷淡秋佳節又從愁裏過
故鄉不似舊時游試拈紅葉題詩句強摘黃花泛酒甌
落帽龍山幾人在雲沈鳥沒恨悠悠

節物催人分外愁，干戈眼底未能休。
丹楓落處吳江冷，黃菊開時壩岸秋。
可是涼風添寂寞，更堪缺月照綢繆。
悠悠今古何須問，淚洒牛山亦過憂。

沁園懷古

風波平地難開眼，劒戟羣山欲割腸。
冠蓋隨時成物故，園林何日破天荒。
摩挲碑石空懷古，點檢圖經為補亡。
誰是熙熙堂上客，近來老子也和光。

和即事

擬將唾手取封侯
世事那禁種種愁
未可搏他馮婦虎
終須享此景升牛
但知勿翦甘棠在
莫為難圖蔓草憂
自古貴人天所予
定教名字到金甌

和新秋

簾捲兩山雨乍停
自知時節候蟲聲
新涼邂逅如佳客
殘暑留連似宿酲
可見韓檠燈下志
且憐班扇篋中情
若為解得吾民愠
更鼓南風一再行

寄史正之

往來門下亦風流分得籌堂幾許憂剛甚養他橫槊馬
何如了取濟川舟人還忌器休投鼠誰為蹊田欲奪牛
聞早抽身閒處著不妨仍帶醉鄉侯

聞捷音招王德華吳天章等出山

紅塵一騎報平安知是元戎小隊還且喜好音來汴水
仍將舊事問潼關橫雲自護車箱濶落日空銜箭筈山
只恐膏肓歸不得早隨春色到人間

用子榮河橋送別韻

河橋把酒不成歡，正是離人去住間。
公道幾時饒白髮，世情今日見青山。
娟娟明月無家對，慘慘孤雲待我還。
慙愧慙慙花裏鳥，一聲聲送出陽關。

承徐子賢賈仲常張伯英寵和復用韻

天涯杯酒強追歡，白髮光陰轉首間。
獨夜夢魂千里月，暮年心事數重山。
回腸都為愁將斷，行脚猶疑債未還。
儻得一廛休老地，柴門今後定牢關。

宿村舍

四首

別後曾無一日歡風光都在落花間
眼青羞對門前柳頭白相驚雪裏山
華表鶴來猶是客烏衣燕去不知還
森森庭院荒荆棘虎豹窺人夜撼關

握手親情有底歡疎籬茅舍兩三間
尚憐作者千年調那肯分人一半山
安得意如張翰適憑誰放取浩然還
得君斗酒須防客不怕重門更著關

坡云重門著關不為君政恐惡客來仇餉

懷抱何曾得少歡春愁飛上兩眉間
一瓢謾酌獨清水

幾屐能窮無盡山見說酒兵長日備

江諮議酒猶兵也可千日不用不可

一日不備酒可千日不飲不可一飲不醉

未知詩債幾時還須防別後將軍

樂不待尋盟輒斬關

三兩殘杯不盡歡強陪年少貴游間客中未必常為客
山上那堪復有山鶴髮都從愁裏變貂裘直待醉時還
一朝却入龐公市驚倒城門老抱關

坡云城門抱關卒怪我此重游

閔董用之

怪底年來懶下帷似嫌膀尾姓名題一枝自謂鳥難借
百里誰知鳳宵棲頗訝生前徒強項未應老後不然臍
試將點檢平時友大半佳城在馬蹄

用之次韻復答

小齋飄雨注風帷門外青山困品題足躡盡知齊是假
膽嘗爭奈越猶棲任教別後書盈篋贏得年來氣暖臍
聊與老農歌帝力一缸村酒薦豚蹄

夜雨

五月十八日夜雨濟之君祥正之顯之漢卿
子昂燈下酌酒相賀喜而為之書

元氣淋漓徹九垓那消掩耳一聲雷雨雖不解知時節
雲豈無心出岫來所恨龍潛猶未起大都天意卒難回
等閒莫話為霖事且對簷花盡此杯

夜半天公號令催即時驚起阿香雷須知稼穡艱難甚
誰把陰陽變理來不使魃為周地震定應龍自葛陂回
鄰家酒熟留連客聊與愁人共一杯

化工寧許著詩催平地俄驚失筴雷行雨夢從巫峽斷
為霖人自傳巖來老農學稼無多力太史書年有幾回
愛酒陶家纔種秫何如共此即時杯

用之請還府用韻拒之

殄寇將軍力自宜幕中議論可回天氣吞驕虜鞭先著
威定并門檄罷傳正恐一隅防飲酒

張漢臣馬武
有同醉堂

休從

百尺笑求田揚雄祿位誰能動姑為侯芭草太玄

弔劉伯祥

記曾林下見臞仙惆悵紅塵未斷緣不憚廣文寒處坐
屢逢元亮醉時眠難逃辰已賢人歲有負齋鹽太學年
落落天才無地用卻還英氣與山川

伊闕鸛鵲堂二

同王德華子正善卿澤之焦彥昭唐俊卿張
伯宜史正之李文長姚子昂男李楊杜浩然
書壁

千年古道入荒城破屋頽垣一聚塵天地如何收險阻

山川猶覺露精神餘波禹貢朝宗水習俗周南既醉人
把酒西風無限興黃花時節對佳賓

一日灘流淺自分灘頭鷗鷺似通神大都鸞棘無多地
畢竟烏臺得幾人浮世堂堂春易去隨時局局事皆新
當年靈翼今何在滿目西風動白蘋

亂後寄兄二

長劔何人倚太行羶裘入市似驅羊怒降白起不仁趙
死守裴侯無負唐可奈崑炎焚玉石更堪蜀險化豺狼

紫荊猶是堦前樹風雨何時復對牀

萬井中原隲汴梁縱橫大劔與長槍晝烽火豈虛日
左觸右蠻皆戰場丁鶴未歸遠已冢杜鵑猶在蜀堪王
此生不識連昌樂目送孤鴻空斷腸

送趙慶之赴邠州

且莫忽忽數去程一壺別酒為君傾三年簿領妨行樂
十里溪山管送迎湓浦蘆花風裏恨渭城柳色雨中情
三峯無復同州看休著新詩笑不平

別邵陽申伯福昆仲

百里相望邂逅遲如今始得話心期情深堂上留髧夜
興盡山陰訪戴時客舍故人那用送異鄉游子不勝悲
烟村水驛秦川路來往郵筒好寄詩

和子搢來韻

新年桃李似無情回首繁華一夢驚點檢青氍毹非故物
等閒傾蓋昧平生雨中燕子還留客風裏楊花欲送行
試聽東流橋下水向人時作斷腸聲

郭仲山壽日

乘興游山也自賢千金奚羨築臺燕誰為洛下同舟友
人道江頭弄月仙欲向漳源歸舊隱便從莞谷種閒田
縈馳樹得長生理不解如君養性天

和河上修橋

四

故里風光衣錦遊賦詩誰與共臨流相逢依舊山青眼
也有何愁浪白頭官渡方當橫槩日合肥正是著鞭秋
坐間有客誇雄辯不念題橋志未酬

日日相陪杖屨遊往來林下亦風流雲間隱隱堆螺髻

雨後鱗鱗漲鴨頭休恨臨津

臨津河

經始晚且看利涉

河橋

名落成秋尋常公事閒中了詩債如何尚不酬

眼底關山憶舊遊滔滔河漢自東流星槎不覺來天上
鐵鎖那能護石頭顧我已嫌題柱晚喜君正是濟川秋
酒間豪氣誰堪共一醉千金價不酬

落魄天涯頗倦遊片帆歸去得安流幾年無事誇犀首
一旦封侯看虎頭飛將正當南渡日拾遺還是北征秋

龍鍾不稱凌烟像只有山林志可酬

壬寅九日同史正之劉濟之君祥仲寬姚子昂

東城小酌寄錦堂王君玉

長天一色鴈行斜雨過南山氣勢加
懶後不冠羞白髮興來無酒負黃花
何人見憶閒陶令有客徒嘲老孟嘉
秋景滿前宜共賞未應種種屬詩家

興來落筆任橫斜坐上朋尊續續加
貌似葉紅皆被酒頭如雪白也簪花
金風漸急秋將暮玉樹相依客盡嘉

酩酊入城扶不去臨街下馬是誰家

隨州長官張鵬舉暨壻陳振文見過

寂寥秋思梗吟懷幾度柴門鵲噪開
一話勝看江表傳百書不及隴頭梅
馬催行色日邊去鴈送歸程天際來
萬里龍庭莫辭遠中原事業望人才

和子榮悼恒山韻

功名人比漢淮陰猛虎俄因犬輩擒
星落旄頭兵似火雲屯細柳士如林
豈期虞虢乖唇齒謾倚良平作腹心

洒盡英雄憂國淚，變風那得不傷今。

消盡羣陽道長陰，將軍何患敵難擒。
唐家外望歸藩鎮，漢室中興仰羽林。
忽墮曹吳分鼎計，方知胡越濟舟心。
依然錦繡山川在，一旦浮雲變古今。

剛忠公

未除妖氣斗牛間，一夜長星落將壇。
天意欲將金節畀，人心無奈此時寒。
斷頭那肯降朱泚，血指誰思滅賀蘭。
立盡犬行山上召，我公忠烈不容刊。

同濟之遊百家巖懷郭延年有感

三月

雨晴閒向百巖遊，今古都成一段愁。
老衲解回山下虎，

稠禪師

真人跨入洞中牛

陸真子

水流花落三春暮，鳥沒雲

沈萬事休，有道碑前空墮淚。
往來誰復共仙舟，

辛丑中秋夜與用亨漢臣濟之君祥子昂仲寬

及諸同志聚飲於學宮陰不見月二

節物相催近，覺頻勝遊攜。
酒意何勤幾人白髮對明月，
萬里青天愁片雲。
嫋嫋風高秋已半，厭厭客醉夜將分。

督郵氣味從來惡今日尊前也獻芹

戲遂良酒

莫嫌勝日燕遊頻且慰寒窓力學勤白也停杯將問月
退之利劍欲開雲清光難此秋三夜痛飲何辭酒百分
況在泮宮思樂地與君共采水中芹

送別曹漢卿

馬上功名奈老何出門無地不風波憑誰試著回天力
有客空揮卻日戈青眼乍驚行處少赤心常笑話中多
愁人近亦無腸斷又聽離筵送別歌

九日濟之君祥仲寬子昂攜酒於漢臣書齋小酌已而乘興與衆老人會於城西馬氏東籬談笑盡醉抵暮而歸為賦此以紀一時之勝

事

相扶醉袖出西城翠展秋山一望晴坐上孟嘉嘲未解籬邊陶令話多情酒猶強飲狂時藥菊莫尋餐落後英興盡歸來天色暮老人星散月還生

暮春和端甫韻

暮春索詩且以不能陪郊外之遊為恨

雨夕風朝樂事妨老來猶自為花忙春光一歲只三月
尊酒百年能幾場辛苦衙蜂輸蜜課等閒巢燕得泥香
如何復共遨頭醉待把銀瓶指點嘗

承和復用韻

草草杯盤興不妨一年一度送春忙我無酒量難投社
君有詩情合擅場衣錦堂前冠蓋貴落花徑裏綺羅香
暫時忘却愁滋味驀上心來似膽嘗

答趙之美見和

不堪春事等閒妨
汲汲光陰過隙忙
青眼久懸高士榻
白頭羞入少年場
風從定後花猶落
月自修來桂復香
休向兵廚問消息
且教下馬客先嘗

之美有深鎮兵
厨未許嘗之句

李子搢約同上山督之

踏青時節醉何妨
一掬歸心想見忙
杖履不須從捷徑
觥籌且莫戀歡場
明山秀水家家景
野草閒花處處香
休訝登臨無脚力
世間險阻備曾嘗

答史正之

正之至連日清話限不能文字飲也時三月

晦日

草堂深處百無妨却為高岑對屬忙

高適岑參杜
遠知對屬忙啼鳥

送春歸闌苑妖星亂世踣文場閒花空怨綠衣使煮酒
不隨青杏香見說麴生風味少尚堪留與老饕嘗

陽城題北臺觀壁

幾年空負北山移今日方知見事遲猶憶王鳬初去後

忽驚下鶴暫來時雖無壁上題名記頗愧棠陰聽訟詩
指似荒城舊遊處西風搖落菊花期

客中寒食

斷蓬蹤跡寄天涯劒戟林中閱歲華又值禁烟焦舉節
焦亦作周奈無對月少陵家驚心吐吐催歸鳥觸目冥冥濺
淚花老後愁懷誰遣得未應端的酒勝茶

和徐子賢西行留別

便從傾蓋話詩情風雨端能落筆驚金馬謾誇三學士

碧油曾見一書生竹溪花圃留連醉水郭烟村取次行
自恨年來懷抱惡與君相別但吞聲

調祁定之

風埃滿面髮蓬垂欲學喬松久遠期浮世幾場漂杵血
流年一局爛柯碁不須王女引巢父那在神官邀退之
果待吹噓送天上人間事了未為遲

姪謙甫鞏縣寄魚

掣三牽兩得沈腥顧我庖厨遠未能幾度敲針無處釣

一朝醒酒不須冰居官止合如羊續命駕何須學季鷹
當念家風本寒素莫從今後爇饒燈

母師聖醉中落水用郭進之韻

無人橋上醉婆娑脚力危時可奈何賀監未應真落井
屈平到底也隨波浮雲世事黃梁夢斜日秋風薤露歌
點檢交情能有幾柴門今後雀堪羅

下鰲背

浮雲蹤跡去留難谷謗巖嘲勒我還畢竟一身無著處

大都百計不如閒無多伎倆三休外是亦風流二老間
昨日主人今日客回頭山色若為顏

許司諫歸來圖

社稷憂深志未舒陸渾山下賦閒居幾年不復朝雞夢

一旦翻隨隴鶴書

闕

朱雲徒折檻寵踰疎

闕

懸車

商巖了却和羹事方信旁求象不虛

寄伊陽令周文之括戶

幾年客裏厭馳驅故向伊川好處居剛受一廛同許子

誰知四壁過相如
厥田不稱中中賦
此事真堪咄咄書
疲俗脂膏今已盡
看看鞭算及舟車

和子搢秋晚出郭

陶寫詩人得句忙
舊游能復憶嵩陽
山頭雲霽雨聲歇
水面風來花信香
今日事雖非向日
故鄉景自勝他鄉
杖藜忘却尋歸路
獨立河橋詠晚涼

和述懷二

簪履三千氣壓齊
寒林那羨一枝棲
坐中有客鶚將賦

門外何人鳳欲題
沽酒未嘗防惡犬
著鞭寧復待荒雞
夕陽休凭欄干望
今日長安不在西

擬將齊物物難齊
惟有山林跡可棲
身望鳳池慙不到
名登鴈塔愧先題
未能忘舊歸家鶴
長是思鳴失旦雞
天為東周道垂喪
肯生夫子在關西

戲嘲

江西社裏幾詩流
詠月嘲風未肯休
得句不能當競病
措辭那敢向春秋
笑翻王氏三珠樹
驚倒張家五鳳樓

帶繫雪詩三十韻勝如騎鶴上揚州

答子榮

行藏事拙且乘流游徧人間老即休多汗愈膚三伏暑
漸衰潘鬢一時秋風高勢欲欺茅屋雨急聲疑在竹樓
今世宦情何處好但憂無鱗有監州

送史邦直入洛

肉山南去汗如流了取公家事便休征棹不需瓜蔓水
歸裝莫待菊花秋忙中暫過平嵩閣別後頻登望省樓

若問鶴鳴近消息翅翎飛不到揚州

即事

鐵馬長驅汗血流眼前
戈甲幾時休誰能牢似陳平社
那免悲如宋玉秋漠漠微涼風裏
殿蕭蕭殘夜水邊樓
千村萬落荒荆棘何止山東二百州

寬張文玘

怪來久不造龍門
依舊相逢一笑溫
任把錦囊嘲李賀
休將布鼓詫王尊
事隨勢過心猶駭
言與時違舌可吞

誰為書生肯推轂綈袍且念故人恩

和竇君瑞

勒石燕山後世名

憲

子孫蟬蛻起風塵

融

誰憐喜鵲飛

來意

由

自歎靈樁老大身

禹鈞

愁見灌夫杯酒過

嬰

夢

驚蘇蕙錦書新

涵

幾年客裏無情話一笑相逢姓麥人

竇子溫宅為有力者所奪

謾勞買宅著千萬此又卜居何適從得把茅來頭可蓋
但教窓下膝能容尚憐相賀巢邊燕知為誰甜花底蜂

速向元龍問閒舍暫將一榻過今冬

子榮途中見憶有先生在世人中龍三十年前
到月宮之句依韻謝答

高樓日日望元龍
禾黍離離閔故宮
兩地謾看千里月
五湖能借半帆風
囊錐穎脫何難出
名紙毛生未肯通
好在沁陽山色裏
一廬寧許寄楊雄

弔曹慶之

杯酒中間氣沓拖
從教千丈起風波
絲棼世事無一可

花落人生得幾何，休向棘林長夜哭。
試聽蒿里送行歌，豈容身後鍾君在。
阿鷺如今嫁者多。

弔王德華

衰鬢愁添鏡裏絲，流年恰及夢中著。
可憐白日佳城地，

正值黃楊厄閏時。

丁亥閏十一月

撫柩恨深元伯母，負薪清慘

叔教兒髡髽不識生。前樂枉却招魂費，楚辭

贈醫郭顯道

小隱嵩陽種德時，智能博物物皆歸。
籠中無愧狄仁傑，

山下常逢臺孝威子細論來生可養斬新卦得遯之肥
麓疎誰似嵇中散幽憤詩成憶采薇

焦彥昭失中子

相逢地下果何如自謂情鍾亦太愚未必珠能空老蚌
豈期玄不與童烏且憐商也無三罪尚喜徐卿有二雛
萬事盡歸天子奪速宜收淚謝玄夫

讀五代史

破却千金築一臺折衝閭外望人才中原山嶽河分斷

塞上牛羊草引來西海正驚天
狗墮北人忽擁帝羈回
猶憐仙掌英靈在能把潼關閉不開

春溫軒

三尺枯桐膝上橫一彈洗盡綺羅塵
芙蓉城裏誰為主
姑射山前別有人雲雨不侵行處夢丹青
難寫醉時真
早尋林下乘鸞侶莫遣春溫過却春

索和長平諸詩友送行韻信筆奉呈君王閨之

資客中一笑

四

漢厦非無論道韞自慙老去鬢皤然閒愁似海藏皮裏
往事如風過耳邊幾度班荆誰與話一朝傾盖自相憐
柴門近日多來客火速移牀待孝先

青春人物正當時咫尺雲天快樂披相見便如膠漆密
此行還似箬弦離方傳細柳將軍令或賦甘棠召伯詩
待得一朝公事了聯鑣西去未為遲

此身莫輒犯針毡只合浮沈委自然久墮風波人海裏
暫依雲漢使星邊斗升乞活真堪笑青紫歸耕亦可憐

早晚皇家重名器著鞭當在祖生先

老覺龕踈過往時赤心今始為君披交情大抵無新舊
人事從來有合離見說片辭能折獄未嘗一話不言詩
河東自古文明地可惜儒冠感遇遲

昨晚蒙降臨無以為待早赴院謝聞已長往何
行之速也因去人寄達少慰客中未伸之志
耳二

縱橫入市盡裘纒一旦衣冠氣索然豈信魯連歸海上

頗哀屈子老江邊
汗流石馬誰堪恨
草沒銅駝世所憐
莫憚區區困刀筆
論功終讓指蹤先

書生掉舌豈其時
手底青編亦倦披
鐵鎖尚沈江漠漠
銅駝又沒草離離
陰山路上明妃曲
天寶年中杜甫詩
古往今來幾興廢
白頭恨見太平遲

任仲山談西府事

德音到處下情通
喜動山城百歲翁
和氣挽回中國化
威聲振起外臺風
少酬漢使澄清志
不愧周官變理功

南北封疆歸一統太平立法自河東

唐臣滿月洗兒索詩故賦

兩滿月

白頭休恨夢熊遲却是人間久遠期有客已為摩頂記
為君復草弄璋詩一從老蚌生珠後再值姮娥月滿時
咫尺昂霄看英物不須女子作門楣

有二女

留題靳載之園亭

幽徑疎籬竹外村淡煙斜日水邊城地形占氣辨南北
風俗以人分重輕坐上有山園似畫樽中得酒論如兵

青春將種多才調拂袖林泉恐不情

載之斯千
戶之子

送郡侯段正卿北行二

征途萬里朔風寒過盡陰山復有山
歲既在於辰已後星多客向斗牛間
漫漫積雪無冬夏劫劫飛鴻自往還
若到龍庭試回首太行一片白雲間

獵獵霜風墮指寒一鞭行色抵天山
馬嘶衰草孤烟外鴈沒長空落照間
入塞盡穿氊帳過去鄉須待錦衣還
功名大抵黃梁夢薄有田園便好閒

送叅謀劉君祥二

寂厯書齋獨坐寒白頭羞見雪中山虛名得失蝸爭外
浮世榮枯蟻夢間半夜朔風催客起幾時新月望君還
鶴鳴林下無人共何處烟霞不可間

馬首風花拂面寒十年兩度過陰山浮雲暮暮朝朝裏
行鴈兄兄弟弟間大抵故鄉生處樂莫教明主放時還
如今造物尤難料枉使身心不得閒

杜門

近來人事頗相乖，獨坐何曾得好懷。
犬吠為連沽酒市，雞鳴長傍讀書齋。
門終待學張家塞，閨恐難當噲等排。
惡客就中多氣岸，時時下馬繫堂堦。

中秋二

露下天街一氣涼，月明不復被雲妨。
正當金帝行秋令，疑是銀河洗夜光。
蛟室影寒珠有淚，蟾宮風散桂飄香。
席間醉客忙歸去，獨共三人盡此觴。

共對青天好舉觴，從前三五是尋常。
一年佳節秋將半，

萬里清輝夜未央
纔向缺時舒窈窕
欲從盈後斂光芒
姮娥曾得長生藥
我欲停杯問此方

和喬舜臣韻

六月十四日二

畫圖懸箇老人星
一炷香烟禱處靈
見說蟠桃將結子
不知槁木已忘形
倚空山色青排闥
掃地槐陰綠滿庭
凡骨恨無輕舉便
且求強健保殘齡

幾年髣髴已垂星
豈是長生藥不靈
席上精神歡伯力
塵中面目偶人形
來歸徒訝荒陶徑
學退還思過鯉庭

鄭重世情相愛甚一杯酒勸望延齡

郎子雲酒熟同李茂卿史正之豪取不許

愛錢措大眼孔小病酒先生舌本乾債是尋常誰不有
囊嫌羞澁且留看三人未必一人損豪氣難忘習氣酸
眊眊相逢欲空去從來如此四并難

再赴陽城用前韻別茂卿子雲正之

誰使腰間印欲懸不知面上唾纔乾先生敢以督郵去
坐客莫將官長看祖席又成攜手別離杯何苦上眉酸

且休凋落高陽社來往雙鳬也不難

代樂仲和張溫甫處督米

未必書生氣盡寒食常不足為居間清於孺子滄浪水
瘦似詩人飯顆山欲向田文彈缺去恐因邱嫂頡羹還
聞君自有江湖量肯為枯魚少破慳

清明席上同史正之姚君寶子昂

浮雲雨後自縱橫不待風收放曉晴百計花期成謾興
一年春色過清明誰家鑽燧罷藏火何處吹簫猶賣餠

回首故園魂欲斷鳥飛只是片時程

悼亡

須信人生足別離別離不待白頭時因憐曩日在縲紲
豈憚今朝炊爨房中道奈何奔月去此情惟有落花知
眼前活計無聊甚空對當年紙局碁

段侯行春顯聖觀喜雨

癸卯季春小旱清明後七日段侯正卿行縣
回會名流勝士五十餘人於仙翁山下之顯

聖觀須臾雨作自未至亥而止大滿人望酌
酒相賀莫不盡酣適之興張種德有詩因和
韻以紀其勝元帥申甫段王使姚昇書於壁

行春冠蓋暫躊躇誰信東山面目疎興盡奚勞風送客
氣和不覺雨隨車移民雖恨梁加少腐粟猶誇漢有餘
獨嘆吾儒有何貴自今牛角莫橫書

傷儒人
種田事

寄答趙公定

他人共折依依柳居士但飲薄薄酒豈其必取齊之姜

又恐不為白也母雖然客或許敦龐慙愧我無白璧雙
更向稠桑老人卜準備買紅纏酒缸

姚子昂壽日

二月初三日

門外風光二月初衣冠把酒慶懸弧一生接物無腸蟹
萬事隨緣短脰鳬坐上書空窺草聖醉中疥壁笑詩奴
年來世事俱嘗遍只合千金養客軀

又用濟之韻贈子昂

綿綿宗派自何時借問吳興第幾支書愛換鵝功不到

獄因劾鼠法先知為秦徙木思無地在漢高門福有基

此去鄉閭結仁愛請君聽取忍齋詩

有仁人已結鄉閭愛之句

為劉益之營中上王懷州

自分毛錐不入時如今尤恨掃門遲徒勞魏氏貪鷄肋
却笑虞人望殺皮未有赤心相待處奈何白髮是歸期
儻令扶病還桑梓橫草難忘報所知

羶帳連雲逐日移胡笳月底不勝悲中原為患有驕子
造物戲人如小兒馮鉞縱彈無便去晏驂未解有誰知

天涯回首消魂處故國霜前鴈過時

錦堂碧落壽席

年五十一

年光過隙一何忙知命年來百念忘公事了時陰德大
塵緣斷後道心涼未償勇退求閒志先得長生不老方
共勸十分添壽酒莫辭酩酊醉山堂

答張文玘見戲

邂逅騷人興愈多不知賜也許同科君猶老去詩魔在
我奈新來技癢何但幸近無阿買寫憑誰付與雪兒歌

一從探得驪珠後驚倒中洲蚌與蟲

和王李文襄陽變後二

逐鹿中原未識真指蹤元自有謀臣虞全不念唇亡國
楚恐難當舌在人拔劒挽回牛斗氣舉鞭威起漢江塵
相逢空灑英雄淚誰是荊州一角麟

天命須分偽與真衙蜂戰蟻盡君臣蛟龍不是池中物
燕雀休嗤壠上人衣不能勝嵇紹血扇無可奈庾公塵
自從絕筆春秋後誰復傷時為泣麟

僧奴

劉氏甥十一月二十一日生籌堂子

白髮因緣短犢車可憐小德外家無蚌生珠後何嫌老
鳳有毛時亦自殊會看伯仁興絡秀不妨節信論潛夫
劉生誰謂難成事將相從來有種子

注劉牢之甥酷似其舅共舉大事誰謂無成

喜事相尋種種來豈期天意一朝回璋從弄後熊無夢
月到圓時蚌有胎便可字教阿買識那消錢為窟郎堆
賢愚懷抱俱休挂且盡前尊露頂杯

和楊之美韻

光華異域伏全才
銜命忽忽出吹臺
物外英標傾水鏡
坐中妙語落瓊瑰
節回北闕旋如斗
名振西陲聽若雷
不踏賀蘭山下石
國風未合入詩來

和李唐傑韻二

翰墨場中第一人
而今委翅在雞羣
縱橫詩律凌徐庾
浩汗詞源婉典墳
兵氣橫流存此老
天心未欲喪斯文
年來草就歸田賦
嘯傲南山卧白雲

郵筒寄後憶詩人
落落英才迥出羣
試問槐花忙幾舉
可憐桂子落誰墳
浮沈且與陪中立
喜愠何嘗見子文
傾破葵心望天表
龍庭不日會風雲

大朝再試

悼籌堂

霞鞍金轡紫絲條
玉帶紅靴織翠袍
赳赳少年真手臂
津津王氣見眉毫
不愁造化功難補
可惜秋山勢自高
那免牛車身後患
一場春夢亦徒勞

和秦克容來韻

白頭羞入利名場得得歸來自遠方何日詩豪離上黨
去年道話憶山陽可憐杜宇訴亡國還笑沐猴思故鄉
不意閒中春色早黃鸝啼破謝家庄

癸酉榜後寄姪謹甫

第一科

萬軸牙籤未是多十年辛苦短檠歌敢忘奕世箕裘業
忽玷清朝甲乙科我已夢君三舉後君如輸我一籌何
二疏此去人方識名字先應報大羅

塵忝後夢一人云王道衡李撫更三舉二人亦高第

癸酉省試王道衡第二御試撫第二道衡第十一隅
三舉也本壬申舉場為兵事移至次年

和安齋見寄調祁定之

麻衣補破紙為條不羨仙人宮錦袍
天地老於雙轉轂
山河渺似一秋毫
煉深寶鼎丹砂就
瑩徹靈臺夜月高
上界而今官府足
暫游塵世莫辭勞

莊靖集卷二